

## معاش مرحوم

يا دوب قرشين وكام مليم  
وفاتهوملي باسم معاش  
وكام سبحة على قنديل  
بنور بيهم الماضي اللي راح ولا جاش  
وبنتين سرت الدنيا ميعاد نومهم  
وام بتغسل الوحده مع هدومهم  
ووحله وتوهه في متاهه / وحة حزن  
وكام حيطه بيتحسدوا عشان حاضنانا جواها  
وفيه كام دين وحق علاج  
وكام دمه ساعة ما احتاج افضفض م الوجع والههم  
وناس تتلم.. ناس تمشي وناس بتموت ماتنطقشي  
وصوت مكبوت وضربة سوط على ضلوع البكا لو حن  
وكام ذكرى بدون بكره تعاقب في القلب لو أن

وانا والخوف وأمراضنا  
وكيس مليون بأوجاعي  
بجمع تمنه م الاحباب  
وواشمه الاسم في دراعي  
وانا وبنتين بتفاصيلهم  
وكذب وزيف بدون داعي  
وام بتقسم اللقمه ما بينها وبين أمل في الشوق  
يا مرسال الفراق ما تفوق  
وهات لي حبيبي م الجنه أملي عينيا بملامحه  
واقول له ان البنات سامحوه  
وإني كمان انا مسامحاه  
وإن الدنيا ليه طارحه في قلبي بنات فيهم منه  
وإني دبلت مع إنه  
موصيني أكون فرحه لكل الدنيا بعد ما راح  
وحيده ف دنيا معيوبه  
بتبني فيا كام طوبه وتهدمهم  
وتاخذ مني كل عزيز / مفيش دخان بيبقى لذيذ

مفيش ظالم في ظلمه وجيز  
ولا أحلام تسلّني سعادته تساع وجع قلبي  
صبيه بهمي عشت احبي  
واطبطب ع الجراح فيا  
يا بنت الهم يا غبيه  
مفيش دنيا بدون غيامات  
مفيش آخره بدون علامات  
مراكب سايره بدموعي تقوي الناس على الوقعات  
ونار تتمشى في ضلوعي  
بتعمل للحياة مقامات  
وناس تغدر وناس تصدق وناس عايشه الحياه بالزق  
وكام مليم يدوب قرشين وكيس  
محتاج لحق علاج وكام دمه  
بنزلها ساعة ما احتاج افضفض م الوجع والهم..  
"ياخلق النص جرحه أصم"...

بكتبلكم عني

كان قلبي بيغني وأنا لسه بصفرتين  
قلبي انطوائي صحيح لكنه بيساعكم  
روحي اتبرت م الشوق وم البكى منكم  
بنت ف براح السما والرّهبة وقت الخوف  
تنفع مقام للطوف والرّكنه بين روحها  
والفضفضه ليها

تهرب في حوارها من نقص فعل الناس  
وبتحتويك بهدوء

بنت ف جمال الشوق والحضن والضحكات  
تلقي ف عيونها ساعات الفرحه ويا الحلم  
ركز تشوف أيام وبشر وسرب حمام  
وبيوت وتوت ونخيل وطريق ينجي غريق  
وتشوف بنات الكون شامه ف جمالها الحُر  
جناحاتها مش بتضّر وروحها بتهفهف  
فراشاتها بتترف وتطلّ باستحياء  
تضحك بخفه ودلع.. فتسبّح الأشياء ...